

梅

莊

詩

鈔

敘

京師爲天下文人淵藪臺閣之彥胄監之英吳楚閩粵  
燕齊秦蜀之士霞蒸而雲集天津密邇京師聲名文物  
爲畿輔要區吾友華梅莊實產於此曩與寶坻高寄泉  
任邱邊袖石樹幟詞壇稱畿南三子者也歲戊戌晏在  
都門與梅莊同寓客邸賞奇析疑始訂交焉時於宣南  
坊舍與漢陰溫東川檢討仁和錢冬士農部鎮江李晴  
湖廣文曲阜孔繡山孝廉凡十一人爲詩酒讌集梅莊  
繡山年最少梅莊贈晏詩云儀廡文章妙斬新何如淮  
上有傳人千秋子建逢知己屈宋心思託洛神蓋指余

所撰陳思王年譜也憶昔晏年廿四受知於蕭山湯夫子貢入京師主同鄉汪文端家嗣後公車留滯所識多海內知名士樽酒論文於問學深有助焉丙申夏曾與宜黃黃樹齋歙縣徐廉峰晉江陳頌南甘泉汪孟慈爲江亭展禊之會吾友湯海秋郭羽可黃香鐵張亨甫蔣子瀟潘四農許印林輩凡十六人各爲詩文以紀之固一時之盛也今忽忽已十年矣樹齋侍郎頌南給諫先後解組歸里廉峰亨甫海秋四農俱中年隕謝東川孟慈繡山諸君或羈宦遠方或客游他省皆不得一見獨梅莊佐幕金陵頻歲過淮藉得時親緒論以詩文相切

廁天假之緣何其幸也夫有聚必有散者人情之常耳然而簪纓之會車馬紛闐闐之交袂載雜遝方其聚首拍肩酬酢甚密及其去也如雲飛鳥散杳不知其所之惟文字交經一二十年雖境過情遷未能忍置江雲渭樹時時繫之於懷以此知問學之友與勢利之交果不可同年語也梅莊能文章工篆隸著述甚富近哀所爲詩十六卷屬序於晏晏與梅莊有契交之雅夫何敢辭惟余戢影淮浹絕跡金臺無復進取之志而梅莊發爲詩歌潤色鴻業備承明著作之選仁見翱翔京師接天下之賢俊講求濟時經畫坐言起行以副其生平所

梅莊詩鈔

序

學此編不過嘗鼎一臠云爾山陽丁晏

二  
東觀室

髫年從雲巢舅氏讀書外家授予唐人五七言及青邱五律年十四五在家塾從董梧侯師學作詩文家藏唐宋來詩集最富師才思敏妙酷似溫李冬郎常鈔選歷朝及本朝吳施朱王查袁諸家詩數十卷子每竊窺卽心焉好之而未得門徑也師與樊文卿先生年皆未盈三十已卓然成家推津門兩巨手迨予弱冠拜從余階升師謬蒙以詩賦見許嘗終朝成八韻詩二首同學訝然輒戲呼予爲詩翁是年應童子試者十餘人祇予一人得入泮道光丙戌鄭夢白觀察集闔邑諸生月課以古文詩賦予得與梧侯文卿兩先生常並列超等始

知肆力于詩庚寅受業于梅樹君師沾上詩家與慶雲  
崔念堂同爲張船山先生門下士也時予專攻舉業而  
友朋贈答懷古詠物亦未嘗廢也壬辰後讀禮家居始  
與邊袖石訂交袖石年少氣盛淵博穎銳詩筆迴不猶  
人甲午乙未間互相淬厲頗得他山之助辛丑南游金  
陵依舅氏十載得交海內詩人不祇丁柘塘孔繡山也  
時馬鶴船僑寓金陵亦騷壇奪席者詩無體不工評定  
尤細予南船北馬詩每得諸道途至于衙齋兀坐撫金  
石校說文考證經史詩又不多作矣丙午南游蘇杭紹  
興得詩一卷辛亥滌大江游黃州武昌歸舟復由皖至

汴遇王子梅倡予和汝亦足樂也癸丑同賀杏槎出居  
庸關由宣大赴太原又得詩一卷甲寅出渝關抵開原  
相與談詩者遂無人矣冷齋獨學尚友古人而已當是  
時同寮中工詩賦駢體文者祇王雪庵一人而遼東能  
詩者又得兩人一爲遼陽劉仙樵一爲鐵嶺魏子亭皆  
與予友善泗州傅味琴亦久幕瀋陽以駢體詩古擅長  
者也今則風流雲散差喜與故鄉老友姚菊坪同寓旅  
館話舊論詩有不可多得者矣次兒鼎元供職京師請  
刊予舊作爰鈔輯嘉慶庚辰迄咸豐辛亥詩刪存得一  
千三百餘首先付剞劂其壬子至今又有二千餘首仍



存篋衍予詩隨意謳吟直抒胸臆多淺率謏語原不  
足以災棗梨然綜計生平由少而壯壯而老得力于師  
友之益者良多何敢一日忘故厯述之俾讀予詩者可  
以識性情之所近焉同治己巳端陽長卿自識

梅莊詩鈔目

卷一

先庚集 一百三首

卷二

庚庚集上 一百十首

卷三

庚庚集下 八十三首

卷四

嗜痴集上 九十八首

卷五

嗜齋集下 一百二十一首

卷六

三庚集 九十二首

卷七

南行草 七十五首

卷八

白門集 八十三首

卷九

江中吟 六十五首

卷十

白門續集 八十一首

卷十一

返櫂集 六十一首

卷十二

借帆集 五十九首

卷十三

萍梗集 五十五首

卷十四

於越吟 五十九首

卷十五

賃春集 九十二首

卷十六

于役草 七十四首

右詩鈔十六卷家大人著也家大人博通經籍精熟史鑑詩古文詞特餘事耳是編爲任邱邊袖石當塗馬鶴船兩先生鑒定少年所作十存一二中年所作十汰二三選擇精當頗稱平允歲己巳鼎元宦居京師爰取是編細心讎校授之手民開雕于己巳五月葳事于庚午三月其餘經解史論及文集詞集俟續刊云同治九年三月男鼎元敬識

梅莊詩鈔卷一

庚辰至己丑

先庚集

天津

華長卿

枚宗

樓中望春

庚辰

粘天芳草映紅橋，閒倚樓欄看畫橈。  
千樹桃花半潭水，縱無離別亦魂銷。

郊外書所見

春約詩人去，名園幾度過。  
落花深巷老，飛絮板橋多。  
草閣開三面，漁船泊一河。  
天桃看未了，殘照浸清波。

西郊偶成

枯草寒煙繞墓門，殘陽黯澹照荒墩。  
帘飄獨樹臨河店。

相東言金  
犬吠疎籬落葉村怪鳥隨人尋鬼跡荒池埋骨縮潮痕  
碧燐夜夜明于火知有沙場戰死魂

巫山高

巫山接雲漢望望有高臺宋玉不作賦神女何時來雨  
氣黯巫峽仙風吹不開幽夢無跡尋但聞猿聲哀

秋暮游望

古道無人野菜香隔河烏相染新霜清溪落葉隨流水  
茅舍疏籬帶夕陽破廟狐緡經半卷斷碑落繡字三倉  
王孫莫問蕭蕭草一度秋來一度黃

小園

辛巳

小園春晝閉門時。四壁陰濃夢醒遲。滿院海棠無客到。  
碧闌干外雨如絲。

讀史雜詩

庭花玉樹歌千古。王氣金陵送六朝。到底狂魂終不滅。  
胭脂井畔教吹簫。

宮女爭誇巧樣妝。鬪雞臺上夢淒涼。景華宮殿埋荒草。  
誰放流螢過短牆。

馬嵬坡下草青青。羅襪香生死後靈。南內至今明月好。  
並無人唱雨霖鈴。

可憐艮嶽成焦土。馬上追填絕妙詞。五國城邊沙似雪。



夜深猶夢李師師

秋暮晚眺

夕陽城郭漲炊煙，海氣全銷卯色天。  
僧寺飢鴉投壞木，漁家破網曬空船。  
詩情滂瀆邀吟侶，酸態模糊問酒仙。  
措大無端爭好古，錦囊貯遍五銖錢。

冬晚卽景

負郭河流急，冥濛野色昏。  
人煙橋外市，鐙火樹間村。  
霜冷烏嗥月，天寒犬吠門。  
沽來新釀酒，排闥強開樽。

馬上書所見

壬午

穹野平如掌，寥廓無四極。  
白日照行人，亶亶古道直。  
風

吹車鐸聲。仄逕多荆棘。策蹇過危橋。攬轡無人識。遠望有荒村。野店枕谿側。帘影寫香醪。黯澹斜陽逼。下馬倚長劍。寒氣填胸臆。酒味淡于水。飽啗藜藿食。惡艸不適口。饑饉殊難得。道逢一丐者。狀類含沙蜮。短褐不蔽體。面目深黧黑。向人伸鬼手。一錢尙可值。安得干銅山。速救斯民亟。生者聞之樂。死者長太息。吁嗟溝壑中。朽骨紛如織。

三婦豔

癸未

大婦采蓮子。中婦采蓮花。小婦蕩桂槳。照水還自誇。瞥見綠鴛鴦。交頸睡晴沙。

五君詠

涓于髡

青齊有贅壻酒後無不可髮禿薄簪纓口張類炙輶滅  
燭客盡散坐中留一裸放眼海岱間管晏皆么麼

東方朔

歲星照炯炯譎諫千載無割肉遺細君毋乃類狗屠餓  
骨飢不死果腹鄙侏儒乃知古神仙不盡在江湖

司馬相如

登徒雖好色未解其中妙倦眼過臨邛琴心遇同調消  
渴有文君酒人定狂叫三復白頭吟傾城豈在貌

彌衡

大兒爲孔融小兒爲楊修鼓聲懾老瞞目無廚顧儔狂  
才生亂世懷刺何所投殺身始成名含笑鸚鵡洲

李白

天末有酒星墮地光千里詔賦清平調君臣訂知己巨  
眼識王侯雄名壓詩史拋卻青蓮筆甘學靈均死

大水

一片桑乾水奔流萬馬聲蛟龍起滄海風雨撼孤城浪  
捲荒邨沒潮來壞樹平何人獻奇策買讓涕縱橫

古寺

怪樹集寒鴉空房跳飢鼠古寺靜無人風吹塔鈴語

和十二叔父病中遣興元韻

甲申

慣飲韓康藥重煎顧渚茶月光窗外雪梅影鏡中花  
舊夢留詩稿新愁問酒家阿咸吟思苦獨有步兵誇

絕句

雨絲雲片攬清明夢醒朱樓聽曉鶯楊柳如煙春似海  
酒旗風裏賣花聲

擬五月耕織詩

田園當仲夏繡陌含煙長一犁足甘雨臺影聚朝陽  
矯首望白雲卓午汗如漿灌園有桔槔宛轉聲悠揚柴門

臨水側楊柳夾成行。榴花紅照眼，蒲艾滋青蒼。把酒豈  
棚下笑語出短牆。幾日隴頭麥薰風吹餅香。

嫁作田家婦。炎夏尙紡績。憶昔養蠶時。箔上鋪蘆荻。不  
眠飼桑葉。吐絲聲寂寂。煮繭午風香。汲泉曉露滌。機聲  
勞軋軋。孤燈照四壁。破屋溼雲埋。暑雨苦淋漓。羨彼紅  
閨女。不禁珠淚滴。裹徧綺羅身。誰解當窗織。

高臥

高臥北窗眠。神游小洞天。一簾通鳥語。半榻颺茶煙。月  
影清隨夢。花香妙入禪。牀頭有村酒。不用阮囊錢。

擬太白襄陽曲。

斷雲和雨來峯頭峴山萬疊青于油古城坐擁檀谿水  
石尤風吹行人舟行人到此多駐足殘陽掩映魚鱗屋  
至今不唱白銅鞮水色依然春酒綠春酒年年解醉人  
景升臺畔草橫生可憐鸚鵡空留賦斷送平原禰正平  
荒沙曲岸多奇樹依稀王粲宅邊路萬古酒人夢不歸  
習家池館還如故詩魂不復識蕭梁選樓帝子今何方  
漢皋解佩逢游女別有花邨號木香吁嗟平生不能識  
韓荆州死當封我醉鄉侯醒不能跨黃鶴游但見到處  
皆我之酒樓漢陽樹魚梁洲此身江上一沙鷗古來勝  
境皆如此襄水東南日夜流

宿古寺

古寺臨河岸。蒼涼早得秋。殿深禪座冷。佛老夜燈幽。拜  
月狐升墪。敲鐘鬼上樓。誌公愛詞客。借榻任句留。

感遇 乙酉

梅花生空谷。根株堅似鐵。抱此歲寒心。吐萼凌冰雪。豈  
無桃與李。妖豔爭求說。繁華能幾時。潔白志不屑。山靜  
色彌澹。天寒香自別。但願明月照。何須美人折。

弱冠讀詩書。頗懷廊廟志。致君如堯舜。始了平生事。願  
大每難副。媿無過人智。翰墨誤蒼生。何貴祕書記。迺知  
名公卿。繇來不識字。



親者日以疏疏者日以親世情多顛倒顛倒孫婦人託  
身在華胄動輒恥賤貧寒峻視富貴霄漢澹浮雲富與  
富者親所親在金銀貴與貴者親所親在搢紳金盡書  
種絕視之如路人

江河流萬古滔滔無盡時夏雨漲百川不久涸深池源  
遠流不息物盈輒易腐寄語望洋者無本不足師

孫陽旣棄世世遂無孫陽冀北多良馬伏櫪思邊疆黃  
金土同價頑石玉爭光苟有芻秣恩生平不敢忘誰于  
風塵中卓識辨驪黃

四月十七日夢中作

亂緒如潮湧。尋春到廢園。殘陽留樹影。破屋覓詩魂。徑  
僻花生石。庭空草上垣。幽蹤偏寂靜。日色冷柴門。  
信步上沙隄。崎嶇路欲迷。水環荒寺外。花落板橋西。室  
靜枯僧坐。林深怪鳥啼。行行無處宿。回首白雲低。

田家

田家逢樂歲。徧地稻梁肥。草色潤朝雨。菜香含夕暉。鳥  
鳴爭樹噪。黃蝶繞籬飛。馬上鞭遙指。孤帆天際歸。

通州

青青山色繞河流。古道緇塵撲馬頭。指點夕陽煙外樹。  
一尖塔影是通州。

登高

九日上高閣，遙空一望寬。  
林中疎木葉，天際隱山巒。  
秋色人煙老，河聲落日寒。  
好憑風兩袖，振羽學鵬搏。

正月十九日記夢

丙戌

夢中人不覺，夢裏竟何之。  
快讀有聲畫，閒吟無字詩。  
山川非熟路，花柳記年時。  
欲問桃源客，相逢似故知。

春日郊游

負郭多栽柳，春風水一灣。  
沙隄明似雪，煙樹暗如山。  
寺古有佛坐，巢空無鳥還。  
夕陽將盡處，惆悵白雲間。

長夏

長夏不知夜，眞如入定僧。  
怒蛙喧急雨，健鼠瞰昏燈。  
凭几抄詩卷，杜門辭友朋。  
養閒兼養病，面目有誰憎。

陸氏小園

綠樹成陰一徑遮，讀書客去鳥空譁。  
夕陽小院無人到，鄰女攜童來摘花。

夏夜露坐

夜深風露覺，獨自坐中庭。  
燈影穿窗見，砧聲隔壁聽。  
水明疑上月，螢遠欲迷星。  
花氣消殘暑，宵光冷畫屏。

枕上口占

蕭齋滅玉釭，別院停砧杵。  
深夜靜無聲，寒蛩相對語。

庭中有奇樹

庭中有奇樹，枝葉何青蒼。不堪持贈君，聊以慰所望。相  
隔萬里遠，別離意轉長。欲折須折盡，莫待飛秋霜。

杜門

杜門謝俗客，書史卽生涯。知已無如月，多情惟有花。愁  
深人似佛，病久藥爲茶。骨瘦怯風冷，重重掩碧紗。

大筆

如椽大筆震騷壇，落紙淋漓眼界寬。萬古文章歸掌握，  
一生福命蘊毫端。勁搖五嶽譚何易，橫掃千軍撼已難。  
燕許高才西漢手，鳳樓聲價滿長安。

大樹

識得將軍舊姓馮。南陽佳氣鬱葱葱。會棲鸞鳳陰仍滿。  
縱撼虬螭勢更雄。過眼六朝成大器。聳身百丈起秋風。  
十年未上瑯邪道。枝葉于今又不同。

驄馬行

懸光入陣道路開。追風掣電驍騰來。縱橫萬里無人敵。  
安西都護眞奇才。青驄一出駑駘。奮鐵甲邊疆。思叱撥。  
昂頭不肖受人羈。抱才未試心如渴。玉鞍金絡纏身早。  
踏碎胡沙齧枯艸。霧鬣曾掀天柱。山霜蹶復躡。交河道。  
一時聲價震長安。此馬休作他馬看。皮毛瘦脫錦纏帶。

壯心猶在關山外

登樓有懷沈桂舫孝廉

維鈺

登樓一長望。今古各相催。斜日水中落。好風松下來。多情惟沈約。與我共裴回。思爾不相見。何時酒一杯。

秋夜

醉餘人定後。秋老夜如年。竹影半簾月。茶香一榻煙。挑燈題舊畫。倚枕讀殘編。瓶插黃花好。深宵伴我眠。

塞下曲

匈奴昨夜度陰山。烽火興師指顧間。百萬貔貅飛不到。笳聲先出玉門關。

前軍今已駐涼州。匹馬從戎敢暫留。莫笑書生無策略。  
侯封不許大刀頭。

聞道軍中有二楊。威名先已震燉煌。漢家土地千金值。  
不教單于死戰場。

獵獵西風吹戰袍。雪花如手滿弓刀。皋蘭河北全軍覆。  
露布猶聞汗馬勞。

休洗紅

休洗紅。洗多紅在手。一幅舊羅裙。十年新嫁婦。昔時玉  
指殊纖纖。如今刺繡鍼難拈。

休洗紅。洗多紅。變黃枯柳有衰葉。殘花無豔香。點脂傅



粉今都舊腰支劇減十分瘦

擬左太沖詠史

南山有丹鳳翩翩鳴高岡北山有紫芝爍爍發奇光華  
胄生英俊嶄然氣軒昂俯仰千萬載雲漢皆文章常懷  
班定遠投筆志四方又懷馬文淵立功在邊疆未能脫  
穎出毛錐甘處囊相知在意氣金石爲中腸

我有松柏心取容恥脂韋爾有金玉音日月爭光輝高  
步追龍比百世仰芳徽肝膽期相許視死眞如歸羞爲  
黥彭醢弓藏烏倦飛左眄皋蘭山草荒馬正肥

才華凌昭代英風追太始高才兼捷足功名拾青紫朝

讀古人書暮接天下士好客平原君翩翩佳公子馬卿  
未遇時賁酒成都市英雄不得志千古無殊軌作賦擬  
班揚吟詩繼蘇李一字抵千金價貴雒陽紙

交情無今古相知在心血送客萬里遠攜手河梁別易  
水生暮寒蕭蕭慘風雪快哉博浪椎傷哉漢臣節魯有  
奇男子田橫殊英烈高風直到今海水聲悲咽

朝采首陽薇暮摘湘江蘭蘭香正可紉薇苦不忍餐別  
有山水音笈頴成古歡吳門隱仙尉繼者嚴陵灘離蔬  
釋屣易急流勇退難四海少知己寸心誰識丹側身江  
漢小縱目天地寬富貴等浮雲遼東管幼安

驅馬登太行舉首凌滄洲白日谷中沒黃河天外流  
輟耕吟澤畔秋風生田疇此中有佳士笑傲輕王侯  
羅胸有星宿豎儒非吾儔禰衡媿自薦字滅刺難投  
伏處鄙薄宦榮名任去留三畝子雲宅百尺元龍樓  
嘯歌滿天地澹然無所求

射雕

風烈馬蕭蕭將軍正射雕雙飛盤絕塞一箭入層霄  
飲羽威猶壯摩雲氣不驕匈奴雖未滅應避霍嫖姚  
展翅凌空起黃沙亂草翻暮雲沈大野落日照平原  
毛血淋漓灑雄威願盼存落雕高侍御長笑出橫門

津門新樂府

堆鹽坨 戒游惰也

堆鹽坨堆鹽坨護坨隄岸風生波草蕩百里膏且腴魚  
鹽美利蘆商多蘆商公子多豪富雙臂纏金腰束繡醜  
酥當筵鬪碧雞琵琶一曲拋紅豆朝騎款段馬暮坐雕  
輪車笥輿飛去人喧譁紫雲亂擁櫻桃花堆鹽坨曬鹽  
灘海風獵獵海日乾朱樓高聳嵌瓊欄呼盧夜照燭華  
殘或驅鷹犬逐狐兔彎弓覷雀彈金丸堆鹽坨築鹽場  
昔昔五色光生芒舉頭不見蓬萊島但見奔騰海水隨  
波揚海水桑田終不改古商豪富今安在大兒奢侈小

兒驕十年積聚一年銷君不見鹽堆百丈秋風高

海船塢 足民食也

武帝臺高入碧空熒熒一點搖燈紅飛艘轉運萬餘里  
海波日夜東南風海風挂席絕絃箭濤頭滾滾來如綫  
吳船楚舫集津門大河爭碾菱花面艤船築塢塢藏船  
繞船寒月凝冰堅金穰玉粒不計數船家祈禱多豐年  
年豐處處觴稱酒用等泥沙較升斗船去船來總莫停  
布帆無恙隨風走海船海船環深塢河流活活多門戶  
門戶多羅若屋祭海神焚香祝不願連城希代珍但願  
四海之內無飢民

鈔關橋 裕財賦也

鈔關橋往來商賈停雙橈輸將黃標共紫標揚帆直下  
海門潮潮來飽看桃花漲日斜風正濤聲壯橋上津關  
橋下船繭絲豈肯墮屏障皇華亭畔柳條青河房兩岸  
多疎櫺樓臺燈火人聲沸魚蝦曉市春風腥繁華靡麗  
何時已蘇杭閩粵皆如此寄語持籌握算人可能似此  
河流水二分明月數聲簫匝地垂楊絮亂飄闌干倚徧  
人如玉鬢鬚揚州廿四橋

冰鮮市 勵清節也

冰鮮市市冰鮮河明如鏡清且漣榜人解網風初靜良

夜敲冰月照船冰鮮冰鮮多皎潔白凝美玉寒霏雪此  
味凡人那得知纖塵不滓真超絕頭銜凜凜一條冰玉  
壺心跡宵光激門前一任車如市胸中戰慄尤兢兢脂  
膏自潤多溷濁鮑魚臭味無人覺誰能灌頂倩醍醐  
杼肝肺勤澣濯沖沖聲鑿寒冰堅那容饕餮驅腥羶漁  
翁會在廉泉住不取炎官造孽錢

三岔河 通漕運也

三岔河水面黃銅鏡乍磨萬艘蟻集橫滄波但見東西  
南北行人多蘼蕪夾岸生青草垂楊綠接長安道千家  
城郭起炊煙一片危橋逐飛鳥三岔河水流北蒲帆掩

映遙岑色一城煙月四時花萬家炊火濃于墨三岔河  
水流東鯨濤日浴玻璃紅蜃樓海市何人見無限神仙  
葬此中三岔河水流南狹斜曲巷笙歌酣世間如此多  
歧路天下直無插腳處插腳處天盡頭扁舟一葉任遨  
遊偏頗世路莫輕投河水終不向西流

十字圍 興水利也

河水澄清紅稻肥田間燕子雙雙飛葛沽遙接賀家口  
土人相傳十字圍棟花風起吹紅雨轆轤聲裏唬桑扈  
十圍零落剩兩圍插秧猶擊鼙鼙鼓朝陽含露麥天秋  
田水無聲日夜流近海人家善插蒔炎風五月尙驅牛



雙港水車聲宛轉蜻蜓飛起晴絲卷何人置牖洩春潮  
一彎沽水籠煙軟白玉塘邊碧草茸遺址依舊水溶溶  
土人千載利其利舉杯一酌汪司農

冬日訪水西莊遺址用杜工部遊何將軍山林原

韻

出郭二三里重尋舊板橋枯藤纏古木野鳥亂晴霄此  
日僧閒話當年隱其招主人水西住結想夢魂遙

我愛天行子

慕園老人字天行  
園城西號水西莊

澄懷水樣清庭空惟

睡鶴木落不聞鶯盤設銀絲鱸杯傾玉糝羹谿邊尋贖

跡踏葉繞廊行

莊中有  
枕谿廊

高閣三間聳

芸書閣

長橋一木支。蕩香迷小榭

蕩香榭

蓮粉

墮荒池。筵盡賓朋散。巢空燕雀知。至今將百載。詩卷各

紛披

半畝茅庵住。籬根種野花。犬寒聲似豹。徑古曲如蛇。玉笈書誰讀。金罇酒不賒。舊時鄰尚在。沿岸兩三家。

一自題襟後

心穀著有沽上題襟集。昔一時名士倡和之作。

芳筵幾度開樓空

尋豔雪

對岸爲佟氏豔雪樓

花憶放。細梅四海詩名著。三江國士

來數帆臺畔路

臺在莊中

屐印徧蒼苔

攬翠軒初起

軒亦在莊中

風疏響凍泉。枳霜紅映日。蘆雪白

黏絲菊釀千壺酒。苔堆一徑錢。亦應移畫舫。候月泊前

梅莊詩鈔

卷一

五 東觀室

川莊有候月筋亦名泊月筋

坡號蓮花冷

心穀號蔗塘又號蓮坡

園名芥子香

幸天津高廟巡茶肆於

此

賜名芥園御製碑文

敗蕉經雨潤殘芰引風涼詩社三

生結書廚萬卷藏小移餘繡野繡野無處覓清蒼

一時名勝地零落賸亭池歌曲餘簫管醇醪漉羃離才

招華省客詩誦黨家兒三十年來樂名園更讓隨與水西莊

同時者揚州有馬氏玲瓏山館杭州有趙氏小山堂吳氏餅花齋繼起惟袁氏小倉山房相去已三十年矣

古碣埋黃土高樓鎖碧雲弟兄皆好客茶垞儉堂皆心穀弟兒女

亦能文心穀室人金氏子犁雨田千頃莊有一犁春雨諸勝浮螺

水二分善和善長皆工詩屋南留小築花柳憶續紛

又有碧海浮螺亭

風景已如此詩人今若何故園留我住

予家德星別墅在芥園東百餘

步亦水西莊遺址中有

遺稿讓君多

心穀著有蔗塘未定稿蔗塘外集游

盤日紀蓮坡詩話儉堂有銅鼓書屋遺稿善和有東軒詩稿

憶否花間醉終傷月下

歌亭亭亭畔客踏雪幾經過

好夢

丁亥

好夢初回晝漸長東風吹暖棟花香南園春草依然綠  
蝴蝶一雙飛過牆

冬晚游眺

鎮日朔風吼天垂萬里陰亂冰吞斷岸殘雪舞空林寒  
覺人煙少愁添歲月侵遙知灞橋客驢背自孤吟

喜沈桂舫旋津話舊

戊子

天涯數知已，獨有沈休文。自別花前酒，神牽沾上雲。關心懷舊雨，總角憶同羣。今日重傾蓋，清譚至夜分。

津門雜感

海潮莽割蔚藍天，炯炯霞光萬丈纏。東下亂帆輕似葉，北來幽鳥澹于煙。少年詩思傾囊底，名士風懷問酒邊。多少狂生飢欲死，銅山誰鑄鄧通錢。

豔雪樓頭冷翠屏，水西莊上聚詩靈。酒拚北海千回醉，花供南豐一瓣馨。臺榭半爲新鬼踞，笙歌全付老龍聽。可憐芥子須彌納，難覓浮螺舊艸亭。

無邊春色湧新愁。滾滾長河繞郭流。臺廢難尋古章武。  
月明偏照小揚州。千家鹽米喧城市。四季魚蝦饜酒樓。  
菊部櫻桃花萬朵。沿街爭唱大隄頭。

子牙河畔釣臺存。楊柳青邊野色昏。海氣攢天撈蜃蛤。  
朝光鋪地散雞豚。百年祠宇棲淫鬼。十丈城樓妥綸魂。  
大買豪華銷似雪。有誰思報信陵恩。

過古祠

識得河邊路。疎林露古祠。客來僧不覺。犬吠鳥先知。寺  
敗秋風早。樓高落日遲。空庭黃葉滿。小立讀殘碑。

偶然作

飢鷹高颺去遠過涼馬臺緩急何所恃飛龍豈將才三  
賦阿得脂白日蔽雲霾

我愛灌將軍好武不好文募士報父仇破吳建奇勳名  
譽滿潁水高義薄青雲結交重魏其肝膽已許君失寵  
既無勢吏士趨田蚡賓客日盈座壽酒飲微醺武安不  
膝席嘻笑罵貴人甘效兒女子耳語殊難聞一錢尙不  
值熱客奚足珍

露坐

傍晚空庭坐花間露溼衣殘星隨月墮孤雁帶雲飛暑  
氣未全散秋心猶未歸燐燐螢火亂只覺夜光微

旅懷

秋風吹不斷誰識范丹貧暫與妻孥別遠隨僮僕親看  
山宜對酒見月輒懷人欲寄家書去飛鴻在水濱

落葉

落葉隨風起驚沙戰水濱飢鴉鳴似鬼病鵠立如人缺  
月墮無跡長河看未真壞雲吹片片秋色老征塵

寒夜不寐

古夢去無跡伏枕殘鐙背萬籟息深宵窮巷孤犬吠元  
鷗豐窗紙忽聞柝聲碎凍骨徹鐵衾千慮一時廢

追和曹堯賓大游仙詩元韻

己丑



不駕雲駟駕翠華瑤池擁起赤城霞人游福地風初靜  
樂奏鈞天日未斜八駿何須封紫禁六龍無處覓丹砂  
筵前誰種蟠桃樹果否能開頃刻花

穆王譙王母于九  
光流霞館

人在崑崙第一峯祥雲靉靄勢如龍河山五萬頻開眼  
宮女三千盡斂容望去樓臺騰紫氣來時簫管奏黃鐘  
東方曼倩非凡骨能識神仙有定蹤

漢武帝將候西王  
母下降

香煙華氣繞仙壇益地圖成萬國歡青鳥曾來宮裏報  
紅塵只作夢中看春光滿座桃應熟夜氣侵人酒欲寒  
果否上方能辟穀杯盤交錯興彌闌

漢武帝于宮中譙  
西王母

一別仙容胡不歸哀蟬落葉共飛飛傾城貌死香留夢

絕代魂銷淚染衣  
鐙下乍逢顏色頽  
帳中重見語音稀  
低回難訴相思苦  
人影模糊酒力微

漢武帝思李夫人

### 戰城南

戰城南死城南  
城南死屍堆如山  
戰城北死城北  
城北老兵知報國  
老兵髮已皓  
年少隨征討  
長隸冠軍侯  
轉戰康居道  
行年將七十  
邾下無弱息  
朝廷又用兵  
將軍重練習  
選兵十萬人  
大半皆飢民  
飢民飢不死  
提戈逐沙塵  
貴人爲主帥  
出師多論議  
豈無馬幼常  
束手苦無計  
一戰祁連山  
再戰玉門關  
用兵先慮敗  
不勝誓不還  
朔風吹戰鼓  
長槍雜巨斧  
昏黑陣雲深  
誰識老兵苦  
烽

火熾妖氛兵弱難立勦將軍不可死兵死替將軍幸而  
賊當滅國恥今朝雪錄成一將功喋徧千夫血譎計禽  
休屠軍功濫吏胥屯田屬趙括未會讀父書千金爛羊  
頭五萬金魚袋買得戰場功屠狗多樊噲將軍入關奏  
凱歌城南城北重經過夜深燐火如星亂風吹新鬼哭  
聲多

年來

驚覺秋聲到蕭騷一夜風空階鳴絡緯涼露溼梧桐塵  
世隨流水功名付轉蓬年來辛苦慣惱煞黑頭公

冬夜述懷

元颺吼冬夜，廖廓寒如鑄。明月照堅冰，嚴霜被枯樹。白  
屋凍雲擁，忽忽歲云莫。萬卉盡刁騷，梅華冒古渡。畸士  
窮不死，輶軻寄豪素。情傷招隱詩，愁寫長門賦。所懷良  
不惡，苦被儒冠誤。何當奮翼鳴，大鳥天南度。

武帝臺懷古

城南一片寒鴉起，蜃樓萬丈生海底。颶風吹浪高拍天，  
誰信神仙終不死。神仙彷彿居蓬萊，音容縹緲空徘徊。  
行人下馬繫枯樹，秋風落日獨登臺。臺高矗矗今已古，  
不是秦皇是漢武。蘆蒿滿地靜無人，鼉胥罟罟紅覆土。  
當年武帝罷塵戰，衛霍勛名繪便殿。文成五利帛飯牛，

七十二家競封禪一心欲覓長年藥拋棄鸞輿思跨鶴  
登臺翹首望方壺帝王那及神仙樂倉卒巫蠱起青宮  
鼎湖寃結由江充博望苑中春艸綠泉鳩水畔野花紅  
花開花落春風好思子宮邊春又老夕陽重上望思臺  
西河淚灑心如擣傾國傾城在何處兒女英雄今始悟  
可憐一詔下輪臺白雲黃葉秋風來吁嗟乎不求佛不  
求仙幾經滄海成桑田留得此臺葬魂魄茂陵回首空  
雲煙

梅莊詩鈔卷一

男鼎元校字

梅莊詩鈔卷二

庚寅至壬辰

庚庚集上

天津 華長卿 枚宗

津沽竹枝詞

庚寅

西沽楊柳大紅橋，多少輪蹄別路遙。  
青眼送君君不見，再來翻覺更魂銷。

小直沽前颺酒旗，麥風翦翦雨絲絲。  
海棠滿院陰鋪地，又到黃花魚上時。

楊柳青邊多楊柳，桃花寺裏盡桃花。  
柳條折去花飛去，夫婿三年未到家。

茸茸芳草碧盈村，澹澹梨花白映門。  
一抹殘陽初過雨。

綠楊城郭賣河豚。

白蓮花豔勝芳鎮。紅藥花開大覺庵。七十二沽花共水。  
一般風味小江南。

十字圍邊古釣臺。葛沽紅稻花爭開。漁翁補網月初落。  
時有香風撲面來。

當場絲管奏殷勤。酷似揚州月二分。一曲琵琶歌蕩子。  
斷腸聲調不堪聞。

新來菊部唱涼州。年少王孫爭一游。攜得梨園佳子弟。  
四更同醉酒家樓。

徒駭河干多釣徒。如披一幅輞川圖。天寒月黑蘆花岫。

幾點漁燈丁字沽

柴堆火起烈風乾。水局傳鑼指顧間。十萬男兒爭鬪捷。  
火場同作戰場看。

海風獵獵水聲涼。河凍堅冰到北倉。不用贏車不用轎。  
瑯璠世界坐冰牀。

豔雪樓頭啟文社。水西莊上聚詩才。當年詞客如飛絮。  
送入東風總不來。

妾薄命學東野體

空廊響病葉驚散。雙鴛鴦幽月入牀側。照我心。徬徨情。  
人隔千里夫容誰爲芳。下階望牛女。掩面啼殘妝。抱琴



撫一曲訴我九迴腸欲訴不忍訴含愁歸洞房

漢銅雁足鐙歌

建昭三年歲乙酉元城王鳳爲元舅渭陵祭器今尙存  
銅盤銘勒龜龍紐當年后父封陽平外戚無權似寶嬰  
王禁已死鳳初嗣瓊樓金屋鐙光熒初封二千六百戶  
益以八千制不古銅鐙能禁漢家煙不照詩書照歌舞  
考功創令內者造上林宮中制度巧一枝盤屈雁足形  
小篆書銘曰永寶斑斕古色光陸離儼如鼎鼐同鍾彝  
蜿蜒屈曲似釵股六十一字珍珠奇安成門第五侯家  
臺閣鐙光燦九華後大廚中畱古器籀文鳥篆騰虺蛇

君不見征南將軍馬伏波交趾銅柱高巍峩又不見洛陽宮門峙銅駝眼前閱歷荆榛多此鐙至今一千八百六十有六年堪與銅駝銅柱同流傳

追輓外大父存圃先生

慷慨從戎出玉門直聲強項滿乾坤風沙萬里詩千首湖海三人酒一尊夢裏家山逢骨肉眼前科第到兒孫聖朝猶識真循吏陶令歸來松菊存

寄徐浣雲孝廉

文煥

涼風起蘋末搖落故園秋知己不相見懷人獨上樓姓名甘潦倒身世任沈浮若問平生事江湖有釣舟

兩地寸心知。交從總角時。憐君爲客早。悔我著書遲。明月三杯酒。梅花一卷詩。眼前秋色老。紅豆最相思。古木落黃葉。征人又別家。新歌燕市月。舊夢洛陽花。去國悲王粲。登高憶孟嘉。願隨竿木戲。雲裏望京華。

讀史偶然作

青年幾作孫家虜。白首應稱太上皇。社稷有靈傳北地。鄧鍾何敢渡陳倉。

胡不先誅軋犖山。雨鈴空自淚潸潸。長生密誓猶如昨。地下何顏見玉環。

感天蕭后僭遼陽。女亂咸知首漢唐。呂氏野雞周武嬰。

一般權術學媧皇。

亭長奇才媿未能亂臣莽操至今稱胡盧依樣千餘載  
崛起無如皇覺僧

懷愍青衣曾執蓋徽欽白骨號重昏玉關生入新奇事  
何必倉皇又奪門

奸雄易得千年臭潛德難留百世芳十七史中多少傳  
蝨餘姓字半銷亡

待雪

東雲黯黹壓城頭隔牖風聲吹未休煮酒先宜添獸炭  
探梅預擬擁貂裘炊煙未斷尋袁路撥棹還思訪戴舟

翹首看天濃似墨紛紛霰集水邊樓

車中口占 辛卯

催趁輪蹄日欲昏東南回首別津門垂楊夾道西風起  
一路蟬聲到蔡村

送沈友竹 維嶽之松江

不見沈郎久相逢又別離濤聲催暮雨山色助新詩紅  
裊添香處 時友竹新婚滄江挂席時好乘風浪穩莫遣雁書

遲

揭曉後感成

大父科名五十年于今續守舊青氈九方相到追風馬

一第登如上水船庭訓敢忘增白髮慈親差可慰黃泉

旁人爭許何無忌慚媿焉能衣鉢傳

中式名次與雲巢舅氏庚午科同年

亦相若

雜詠史臣

太史龍門萬口稱百三十卷筆飛騰可憐冤獄歸蠶室  
誰向匈奴問李陵

身後遺編飽蝨魚一家勲業竟何如千秋史筆推才女  
夜夜挑燈續漢書

躍馬西池顧盼雄琵琶聲裏怨徐童臨刑羞煞夏侯色  
說鬼難禁血淚紅

祇知帝魏不尊劉，將略公然議武侯。  
佳傳旣需千斛米，緣何仇國紀譙周。

隱侯文史揆天才，佐命蕭梁實可哀。  
至竟齊亡緣底事，有人斷舌夢中來。

負才搗扇傲凡賓，紀載模糊半失真。  
儻使昭明持史筆，一時徐庾盡功臣。

采摭兼搜顧野王，尙書門弟世縹緲。  
順陽閣下扶孱主，博得瀛洲姓字香。

詰汾世系競增誣，伊霍升天頌爾朱。  
無怪紛紛稱穢史，亂拋佛助死頭顱。

七齡能解琅邪稻灰酒沈酣病可醫豈獨史才誇老壯  
詩諷諷誦到樵廝

宇文昏暴極天元文牘荒蕪簡冊煩重購遺書修舊史  
五家新例創華原

老臣何幸繪凌煙骨鯁堪稱寶鑑圓死後是非任謠詠  
豐碑踣倒大墳邊

傅家絕學紹箕裘年少居然國史修烏索不分南北界  
文章八代魯春秋

廬陵史學追班馬五代新唐筆削嚴不沒宋祁與劉昫  
丰神六一取名廉



宋史剛成稿未刪復修耶律共完顏可憐忠烈遭奇毒  
千萬人中砥柱山

何必窮愁始著書無端姦黨列諸孤青宮講讀十餘載  
抵死殘魂泣道塗

青巖山裏舊儒林巡遠英風說到今碧血青燐逐黃月  
滇南終古照丹心

喜余肅齋茂才

作恭

自粵東旋津

壬辰

一自去南海相思直到今逢君重握手爲我撫瑤琴靜  
得絲桐趣別存山水心子期今在否慚媿許知音

燕地五年別羊城萬里遙夢中曾識路相見反魂銷黃

菊影逾淡白梅香亂飄愁懷無處訴合遣酒杯澆

東賀星槎茂才

兆魁

清風吹海濤賀監乘馬至回首望長沙臨風懷賈誼弱  
冠負重名公卿爭羅致春色滿京華秋高鵬展翅別離  
日雖淺結交情獨擊鼓琴問知音相如與徐穉

張家灣題壁

木落西風起行人發浩歌河從蒲口淺樹到蔡村多寺  
古雷殘碣池荒剩敗荷張灣城北路雨後未曾過

題姨母潘淑人不櫛吟

閨閣神仙第一流班昭亦欲覓封侯風塵得句畱妝篋

閩海滇池萬里遊

苦語思親已半生劫餘以後變商聲燕山五桂亭亭立  
都賴熊丸母教成

臥虎橋晚眺

欲到回龍觀重經臥虎橋煖雲生谷口斜日沒山腰城  
郭猶名薊河灣尙姓蕭倚闌西北望絕勝畫圖描

贈邊衰石

浴禮

瀛海有仙客衰中藏怪石五色生光芒溫潤如圭璧不  
以持贈人聊悅性所適舒之等泰華歛之不盈尺夜夢  
遊瑯嬛圖書炫金碧援筆賦天台鏗鎗聲一擲孝先生

華胄弱冠窮史籍趨庭來沾上而能舉鵬翮著作幾等  
身恥言千時策叔子誠多才不教青眼白

楊村道中

午後動征鐸鞭絲去故鄉旅人見青草詩思在斜陽鴉  
背寒猶閃馬蹄晚更忙長安春色好紅杏傍垂楊

早行

夾岍曉風清長隄殘月明山嵐濃有雨河水漲無聲野  
犬向人吠村雞升屋鳴柳陰驅馬過難綰別離情

柳絮代東桂舫

綠楊三月正飛綿風雨旗亭魂黯然幾度漫天團作雪

一經墮地化如煙白眉頓減憑誰畫青眼無多祇自憐  
張緒丰神憔悴盡令人回首憶當年

穆穆萬片更千絲水碧山青日暮時吹入紅塵人不見  
飛來白雨客先知無聲撲面原輕薄有意折腰成別離  
落魄何須悲老大聳身還占最高枝

無限晴絲颺碧空楊花飛盡杏花紅浮生草草隨流水  
別緒依依類斷蓬萬縷情懷縈落日一春心事逐東風  
詩人莫漫題佳句謝氏庭前句已工

亭北橋南半夕暉顛狂時共落花飛萍蹤飄泊生前定  
蓬首纏綿夢裏違裊裊有時沾綠鬢紛紛無數點朱衣

好風若得頻相送，不上青雲總不歸。

贈高寄泉孝廉

繼珩

渤海有高士，相交恨獨遲。  
與君談一夕，勝讀十年詩。  
殘月照杯酒，春風吹鬢絲。  
悲歌爭擊節，腸斷杏花時。  
沾上知名久，論文四座驚。  
等身多著作，放眼小蓬瀛。  
絕調庾開府，離懷張步兵。  
鑄成青鐵研，濡筆任縱橫。

雜詩

腐儒譚俗事，刺刺每不休。  
何如枕史籍，下筆垂千秋。  
雌黃論今人口，舌禍難免苛。  
刻論古人魂魄，無由辯休誇。  
賦萬言且讀書萬卷。

禪不始陶唐征不始成湯俗儒眼如豆豈知溯羲黃海  
淺泰山低地狹九州小麟鳳不足奇錢珎不爲老文王  
子女稀成周享國少洪荒無詩書事蹟難搜討

古聖創奇局作事多不苟禪讓與征誅後世反藉口自  
待如堯舜視君如桀紂除卻劉亭長得國皆可醜

仕宦喪節義由于莽大夫投閣身不死偷生慙綠珠中  
郎哭董卓母乃太過乎旣爲權奸用焉能續漢書可羨  
楚兩翼身死志不汙可笑長樂老狗彘真不如

紉袴爲天子黔黎遭塗炭隋煬與宋徽可入文苑傳文  
士多無行此語千載同一陸與潘張甘事賈南風

千古少完人。天性每多缺。劉劭與楊廣。早已人倫絕。老賊雖萬段。友珪那可說。許止不嘗藥。大惡書陽秋。奈何宋光宗。父死淚不流。

霍光學伊尹。擅自主廢立。後有莽卓徒。弄權相沿習。桐宮迎太甲。未聞殺昌邑。可憐既廢君。性命在呼吸。

太白晝經天。足蹀元武血。燭影夜搖紅。戮地斧聲烈。唐宋兩太宗。兄弟偏有缺。政績雖足稱。良心早已亡。魏徵與趙普。胡不思先皇。

舍子而立弟。殷商法良厚。後世不善學。畫虎反類狗。舍子而立姪。宋國敦孝友。後世相爭競。貽戚復誰咎。善哉



古聖言立嫡兼立才燕棣起靖難此端古未開妙論方正學成王安在哉

千古懼內人首推漢高帝生殺由豔妻妒忌到人彘劉氏幾無遺野雞竟稱制孝武慮太過鉤弋死含冤堪笑  
拓拔珪猶稱茂陵賢

可恨唐中宗下愚不可移身遭武氏亂復受制于妻宮  
中點雙陸不忌武三思如何臨淄王起兵誅韋后一箇  
楊玉環復令三郎走

黨錮起東漢列傳垂班史有唐長慶後羽翼分牛李宋  
立黨人碑諸賢多竄死南渡之偽學傾軋無憾否賢奸

幾混淆報復相終始可憐明東林國亡黨不止小人何足責釀禍由君子

結交貴以澹常恥脂與韋酒食相徵逐貴賤生嫌疑欲廣絕交論毋甯甘守雌孫臆殺龐涓蘇秦害張儀束髮皆同學嫉妬成參差善哉子夏言不可者拒之

損友徧天下便佞與善柔覲面相標榜背面多怨尤好諛恐不工譽盾復毀矛豈無直諒人冰炭難相投十載空擇交知己不易求試讀張陳傳刎頸成仇讐

古來錚錚人焉得人人曉古來碌碌輩間有人日好毀譽且由他蓋棺難論定或稱或不稱此中亦有命

孟獻有五友。當時忘三人。元愷十有六。名字焉能真。洋洋廿一史。豈盡皆實錄。齊東有足信。稗官亦可讀。有書不識字。何貴書盈屋。所以荒經者。一世高閣束。

好詩不在多。一句即可傳。佳文不貴長。百字勝千篇。充棟詩文集。直無暇覆瓿。我自讀我書。不如且飲酒。毋爲古人愚。百年亦俄頃。蝓志尙能傳。有幸有不幸。

漢河間獻王博士毛公君子館甄歌

甄爲河間苗仙露所藏

炎炎四百年。天下宮闕荒涼無片瓦。可憐白土闕銀鉤。不見青苔埋玉笋。當年文景侯。恩澤功狗勛。名垂竹帛。屏藩宏我漢。都京劉氏諸王勢。烜赫吳王跋扈梁。王驕

淮南僭妄江都豪習禮誰解宗大戴敦詩不知法小毛  
兩河之間賢王出被服造次崇道術覓得科斗萬卷書  
博士譚經無暇日峩峩大起日華宮獻樂詔策來三雍  
西京文物自王倡冠裳百代稱儒宗電掣星馳人易老  
以謚名縣堪搜討曾築別館館毛公臺甄殿瓦皆荒草  
哲王大雅自不羣千秋廟貌氣凌雲老樹豐碑多榛莽  
何人來拜獻王墳苗君識字心思苦曾讀瑯嬛辨帝虎  
破甄拾帶土花香隸文兩字足千古吁嗟從古小人多  
君子埋頭奈若何金石不刊名耐久小人到底易銷磨  
墨華揚遍銀光紙援古證今同研史海內詩人競品題

先生不覺掀髯喜一時佳話傳津門我友邊生向我言  
少壯吟詩癖相埒前身曾住詩經村毛公毛公真碩彥  
闕名猶列儒林傳匡鼎說詩徒解頤毛遂處囊羞自薦  
一坏黃土一杯漿既酌毛公復酌王留得片輒贈君子  
河間從此姓名香

送邊心巢

浴仁

褒石

浴禮

昆仲旋里

滿地生春草詩人歸故鄉同行有兄弟攜手拜高堂知  
已暫相別思君情轉長河間多勝迹得句貯奚囊

絕句

日長風靜裊晴絲近郭人家放鴿時睡起不知春已去

倚闌臨水看魚兒

宮詞

舸逐鴟夷去，煙波泛五湖。劇憐臺畔草，生死傍姑蘇。

吳宮

神女來高唐，不入襄王夢。宋玉非登徒，藉此以託諷。

楚宮

燕趙多美女，咸來貯阿房。計年三十六，夜夜夢君王。

秦宮

紅粉教歌舞，黃金買畫工。玉顏勝飛燕，猶自泣秋風。

漢宮

侍婢皆執刀，夫人意氣豪。螺磯聞杜宇，望斷蜀江濤。

蜀宮

鄴城風雨夕，銅爵已凝塵。玉珮兼金枕，由他賦洛神。

魏宮

竹葉引羊車，箱籠納小吏。可笑司馬兒，何如賈后智。

晉宮

貼地蓮生步，齊亡最斷魂。玉兒勝家令，祇解事東昏。

齊宮

朝上望仙閣暮擁張麗華胭脂落井底間唱後庭花

陳宮

楊花搖落盡螢火上迷樓春草年年長無人弔玉鈎

隋宮

自譜霓裳曲拋殘一斛珠樓東知不遠歌管聽模糊

唐宮

和陶公詠貧士詩

貧士多慷慨達人每困窮長歌無和者彈鋏心更雄  
生平鄙肉食能令人昏蒙菲薄到卿相交遊寡所同溫飽  
非吾志含笑視太空此中有真樂陋巷生春風

翁子困采樵行行讀漢書馬卿困酤酒文君能當壚豈  
不思富貴其奈命何如所懼蘊蓄少學飽氣自舒自視  
無長物亭亭七尺軀天地雖云大可以爲我廬

月明涼于水顧影時自憐清風吹襟袖名利兩澹然臣  
朔飢欲死比鄰起炊煙雖無藏金窖時有看囊錢短褐  
不蔽體視之勝絲綿糟糠聊充腹食之勝肥鮮

采薇首陽下餓死身不辭此志良獨難繼者有原思醉  
臥泰山巔東海爲酒池腐骨不填壑翻覺造物私白屋  
少青眼長貧歲月遲漂母飯王孫足以媿鬚眉

送潤田舅氏之任雲南

仕宦天涯感不禁參軍從古屬儒林大才終必騰霄漢  
小試何妨作雨霖卅載功名投萬里一家衣食累千金  
滇南煙樹雲間月振觸諸甥一片心



夏日雜詩

長夏渾無事，裁詩貯短筒。  
眠遲貪對月，坐久愛臨風。  
鴛瓦微藏雀，蛛絲密罥蟲。  
吟成四十字，字字恥雷同。

佳客翩翩至，閒敲一局碁。  
苦茶堪當酒，清話卽成詩。  
短調調元曲，長吟說楚詞。  
瓣香神契久，心願繡袁絲。

榴花開未了，蓮葉已田田。  
鶴避香煙直，魚吞水沫圓。  
迴闌剛鬪鳴，深柳漸聞蟬。  
擬向北窗臥，風來欲化仙。

琴擬嵇中散，詩追王右丞。  
胸懷金粟佛，心迹玉壺冰。  
散米閒分蟻，垂簾謹避蠅。  
日長猶覺短，殘月又東升。

芳草綠侵檻，好花紅過牆。  
芙蓉出清水，荷芰引新涼。  
待

月能堅坐觀書每健忘醇醪拚一醉欲學謫仙狂  
漫埽羊求徑浮生日日閒墨精甯待畫詩好不須刪灑  
水作微雨堆冰爲小山此中可銷夏何必覓深灣  
蕭齋初過雨芳草倍萋萋小院無人到深林有鳥啼晚  
雲蒸玳瑁淺水漲玻瓈俯仰得奇句拈毫紙背題

粉蝶迷紅豆飛蟲上碧紗分棚藤繞竹支架蔓連瓜別  
館人吹笛疏籬自灌花臨池難作字潑墨亂塗鴉

獨坐看新月濃陰覆滿庭花深時見蝶扇冷欲黏螢偶  
搨來禽帖閒評瘞鶴銘雨霖歌一曲淒楚不堪聽

枕石眠深屋看雲上小樓美人空入夢一雨頓驚秋讀

史易生恨彈琴難遣愁。盈盈河漢水。幾日度牽牛。

秋草

芊綿芳草頓驚秋。衰柳斜陽水畔樓。遠志難酬千里恨。  
春暉莫報寸心愁。東皇無意垂青眼。南浦何人弔白頭。  
金粉六朝成底事。隋隄梁苑盡荒邱。

天涯無復綠成茵。滿地黃金莫救貧。戰壘猶存前代血。  
歌場難買四時春。可傳書帶無多字。不負科名有幾人。  
風雨池塘魂夢冷。王孫別後倍傷神。

一生常伴落花紅。剩水殘山付畫工。富貴到頭危若露。  
淒涼滿目偃隨風。沙場有客頻驅馬。輦路無人早閉宮。

此下紛紛埋白骨。百年斷送幾英雄。

黃雲慘淡暮天低。苦雨淒風路轉迷。野燒未乾心已死。  
嚴霜初染醉成泥。茫茫世界皆螢火。草草功名問馬蹄。  
寄語美人莫惆悵。春來依舊綠萋萋。

梅莊詩鈔卷二

男復光校字